

### **Blocatge deus contractes ajudats, ua rentrée dab un gost amar entà Calandreta**

Las escòlas Calandreta deu Bearn qu'avón arrefusat lo renouvelament e/o la creacion deus pòstes d'ASEM (assistant especializat de las escòlas mairaus) dens l'encastre deus contractes ajudats. La baisha deu taus de presa en carga per l'Estat (de 70 tà 52%), en març passat, que presagiava dejà dificultats a passar. La decision d'empachar suu pic los contractes ajudats, , qu'ahorta l'amarèr d'aquera rentrée.

### **Aver recors aus contractes ajudats, ua necessitat**

Per la màger part de las Calandreta que'us hèn hrèita aquestes contractes entà har foncionar las escòlas, que permeten d'apedaçar la manca d'investiment de l'Estat entà finançar las escòlas. Quan las collectivitats s'engatjan aus costats de la loa Calandreta, que podem remarcar qu'an mensh recors aus contractes ajudats.

Calandreta ne sostien pas la precaritat qui va dab lo recors aus emplecs ajudats mes be cau constatar que quan lo finançament public de las associacions assegurant missions de servici public n'ei pas a la hautor, ne podem pas sonque virà'ns de cap tad aqueth tipe de dispositiu.

De mei, tot lo movement que s'avisat de dar aus professionaus ua experiéncia sus un terrenh pedagogic reconeishut e ua formacion linguistica hòrts.

### **Escòlas privadas... òc, mes a gratis !**

Que vòlen har tornar Calandreta de cap a un estatut d'escòla privada entà justificar l'inutilitat d'ajudas d'Estat puish a que quan s'i dit "escòla privada" que vòu díser "escòla paganta". Aquera idèa que s'esmusa sus Calandreta. Qu'ac cau arrebrebar, las nostas Escòlas que son laïcas e a gratis, que son obèrtas tà tots, assegurant ua dobla mission de servici public. Calandreta ne hè pas nat profieit pecuniària dab l'escolarizacion deus escolans. Lo son foncionament que s'empara sus un investiment associatiu hòrt deus pairs deus escolans.

### **Las consequéncias**

Shens emplecs ajudats, los escolans de mairaus e lo lor ensenhant que son privats deu sostien preciós d'ASEM. Arrés non pensaré préner partit contre la pertinéncia d'aqueths emplecs en classa. Aqueras personas ne pòden estar consideradas com un dispositiu « costós e ineficax », que son un deus malhons indispensables de l'accompanhament deus escolans dens las nostas escòlas.

La rentrée que s'organiza plan o mau, que suprimim les ninoèras de fin de dia ací, aquí que demandam l'ajuda deus pairs benevòles... mes aqueras « bricoladas » ne son pas que temporàrias. Delà de l'organizacion de las escòlas, que son detzenats e detzenats de personas tà qui avem sobtament anonciat que ne tribalharén pas mei o qui son a esperar ua eventuaiu signatura de convencion.

Calandreta ne's pòt pas resignar a acceptar aquera situacion.

### **L'aperet au gouvernement e la mobilizacion**

La federacion de las escòlas Calandreta deus Pirenèus Atlanticics, e totas las escòlas immersivas, qu'an aperat lo gouvernement, peu mejan deu Sénher Prefècte, entà que los nostes establiments, qui asseguran ua dobla mission de servici de public, d'educacion (devath contracte d'associacion dab l'Educacion Nationau) e de transmission de las lengas regionaus, e posquian assegurar l'annada escolara a vièner dens condicions serenas.

Que ns'associam a l'inquietèr de tot lo sector non marchand pertocat per la decision deu gouvernement, que cridam a ua **mobilizacion Dissabte 09 de seteme à 09 h30 davant deu Parc de las Mustras de Pau.**